

LOCAL

"De Trupialen" y Frère Alexius a popularizá "Aruba Dushi Tera"

Cu "Aruba Dushi Tera" a bira popular y a logra haya un acogida den pueblo y cerca e hubentud ta gracias na e esfuerzo di Frere Alexius.

E organizacion "De Trupialen", bao gufa di Frere Alexius, "Aruba Dushi Tera" a wordo hincá den nan repertorio y a cuminsá haya mas popularidad. Den corto tempo, casi tur e muchanan di skol tabata sa e canción y tabata canté, hasta durante aubadenan na ocasionnan oficial di Gobierno.

Su popularidad a crece mas ora cu riba iniciativa di Frere Alexius na aña 1954, Radio Kelkboom a graba y lanza un disco 78 rpm di "Aruba Dushi Tera" riba plaza, cantá pa e stemnan hubenil y conmovedor di "De Trupialen", bao direccion di Frere Alexius y compañía den su estilo único na piano pa Padú Lampe. Poco-poco y den forma espontáneo otro instancianan privá y oficial a cuminsá introducí "Aruba Dushi Tera" na tur ocasion importante pa e isla.

Tabata di spera cu "Aruba Dushi Tera" lo bini na consideracion pa bira e himno nacional, ya cu dia 19 di September 1975, na ocasion di inauguracion di e edificio nobo di Parlamento di Aruba, "Aruba Dushi Tera", e biaha aki den estilo di marcha, pa huzga con e ta zona, a resoná den voz di e conocido tenor Arubiano Rufo Odor, respaldá pa e potente coro "Vivons en Chantant", na cual ocasion tur e autoridadnan político di Aruba y Antiyas presente a duné su debido respet y

honor.

Dia 21 di Januari 1976 Gobierno Insular di Aruba a instalá un comision di seis ciudadano prominente y apolítico di comunidad cu e tarea pa consehá Gobierno si "Aruba Dushi Tera" por bira e himno nacional y den cual ritmo, sea wals of marcha. Unánimamente e comision a bai di acuerdo, den voto secreto, pa proclamá "Aruba Dushi Tera" como e himno nacional. E recomendacion a wordo entregá dia 25 di Februari 1976 y riba 16 di Maart 1976 Parlamento di Aruba a aprobá "Aruba Dushi Tera" como e himno oficial di Aruba. Y el a zona promé biaha di e forma aki dia 18 di Maart 1976 den Wilhelmina Stadion unda a keda proclamá oficialmente Aruba su Himno y Bandera. □



ARUBA DUSHI TERA

Aruba patria aprecia,
nos cuna venera,
chikito y simpel bo por ta
pero si respeta.

(Coro:)
O, Aruba, dushi tera,
nos baranca tan stima
nos amor p'abo t'asina grandi
cu n'tin nada pa kibre! (bis)

Bo playanan tan admira
cu palma tur dorna,
bo escudo y bandera ta
orgullo di nos tur!

(Coro:)
Grandeza di bo pueblo ta
su gran cordialidad,
cu Dios por guia y conserva
su amor pa libertad!

(Coro)